

Sa dihang si Violet nahigmata, ang tanang butang nag-uyog!



ANG PAG-AMPO ALANG SA LINOG



Pakigsulti sa imong pamilya mahitungod kon unsay buhaton kon adunay emerhensiya.

Ni Noelle Barrus
(Gibase sa usa ka tinuod nga istorya)

Si Violet natulog sa dihang ang nagdahunog nga tingog nakapahigmata niya. Sa sinugdanan, nagtuo siya nga dalogdog kini.

Apan ang dahunog nagkakusog ug nagkakusog. Miuyog kini sa mga bintana sa iyang kwarto.

Si Violet dali nga nakalingkod. Kini usa ka linog!

Siya ug ang iyang pamilya mibalhin ngadto sa Peru dili pa lang dugay. Siya nasayod nga ang mga linog mahitabo dinhi kanunay. Ug siya ug ang iyang pamilya nakaandam alang niini ug nagpraktis

unsay buhaton. Apan kini mas makahadlok kay sa iyang gituohan. Siya makabati nga nagkurog ang iyang lawas!

Si Violet midagan ngadto sa kusina ug mikamang ilawom sa lamesa. Paglabay sa pipila ka gutlo, ang iyang mga igsoon miapil niya. Mao usab si Mama ug Papa.

“Maayo kay inyong nahinumdoman ang unsay atong gipraktis,” miingon si Papa. “OK ra ba ang tanan?”

Miyango ang mga igsoon ni Violet.

Apan si Violet nahadlok. Siya mipiyong sa iyang mga mata. Lisod ang pagbaliwala sa pag-uyog libot kaniya.

Dayon si Violet nakahinumdom sa pagampo. Gikyugpos niya ang iyang mga bukton ug giduko ang iyang ulo. “Minahal nga Langitnong Amahan,” siya naghunghong, “palihog atimana ang akong pamilya.”

Si Violet nagpadayon sa pagampo. Gibati niya nga ingon og adunay migakos niya. Sa dihang nahuman siya, mitan-aw siya. Si Mama ug Papa mikyugpos sa ilang mga bukton. Ang iyang mga igsoon mao usab ang gibuhat. Silang tanan nagampo! Ang yuta nag-uyog gihapon. Apan si Violet mibati og kalinaw sa iyang kasingkasing ug hunahuna.

Sa katapusan, ang pag-uyog mihunong. Si Violet ug ang iyang pamilya nagpabilin ilawom sa lamesa og dugay-dugay, aron makasegurong luwas.

“Unsay imong gibati?” Si Mama nangutana ni Violet.

“OK,” miingon si Violet. “Sa sinugdanan nahadlok gyod ko. Apan ang pagampo nakatabang nako nga mobati og mas maayo.” Gigakos niya si Mama. Nalipay siya nga ang Langitnong Amahan mitabang kaniya nga mobati og kalinaw. ●

Kini nga istorya nahitabo sa Peru.